



家範典第八十四卷

夫婦部藝文一

史記外戚世家序

漢司馬遷

自古受命帝王及繼體守文之君非獨內德茂也蓋亦有外戚之助焉夏之興也以塗山而桀之放也以末喜殷之興也以有娥紂之殺也嬖妲己周之興也以姜原及太任而幽王之禽也淫於褒姒故易基乾坤詩始關雎書美釐降春秋譏不親迎夫婦之際人道之大倫也禮之用唯婚姻爲兢兢夫樂調而四時和陰陽之變萬物之統也可不慎歟人能弘道無如命何甚哉妃匹之愛君不能得之於臣父不能得之於子況卑下乎旣驩合矣或不能成子姓能成子姓矣或不能要其終豈非命也哉孔子罕稱命蓋難言之也非通幽明之變惡能識乎性命哉

報卓文君書

司馬相如

五味雖甘寧先稻黍五色有燦而不掩韋布惟此綠衣將執子之釜錦水有鴛漢宮有木誦子嘉吟而回予故步當不令負丹青感白頭也

與婦弟任武達書

馮衍

天地之性人有喜怒夫婦之道義有離合先聖之禮士有妻妾雖宗之眇微尙欲踰制年衰歲暮恨入黃泉遭遇妒嫉家道崩壞五子之母足尙在門五年以來日甚歲劇以白爲黑以非爲是造作端末妄生首尾無罪無辜讒口嗷嗷亂匪降天生自婦人青蠅之心不重破國嫉妒之情不憚喪身牝雞之晨維家之索古之大患今始於衍醉飽過差輒爲筵紂房中調戲布散海外張目抵掌以有爲無痛徹蒼天毒流五臟愁令人不賴生忿令人不顧禍入門著牀繼嗣不育紡績織紉了無女工家貧無僮賤爲匹夫故舊見之莫不悽愴曾無憫惜之恩惟一婢武達所見頭無釵珥面無脂澤形骸不蔽手足抱土不原其窮不揆其情跳梁大叫呼若入冥販糖之妾不忍其態計婦當去久矣念兒曹小家無宅使哀憐姜豹常爲奴婢惻惻焦心事事腐腸誦誦藉藉不可聽聞暴虐此婢不死如髮半年之間膿血橫流婢病之後姜竟春炊豹又觸冒泥塗心爲愴然縑縠放散冬衣不補端坐化亂一縷不貫旣無婦道又無母儀忿見侵犯恨見狼籍依倚鄭令如居天上持質相刼詞語百車劍戟在門何暇有讓百弩環舍何可強復舉宗達人解說詞如循環口如布穀縣幡竟天擊鼓動地心不

爲惡身不爲搖耳宜詳居錯且自爲計無以上書告訴相恐狗吠不驚自信其情不去此婦則家不
寧不去此婦則家不清不去此婦則福不生不去此婦則身不榮不去此婦則事不成吾數奇命薄
端相逢遭自恨以華盛時不早自定至於垂白家貧身賤之日養癰長疽自生禍殃衍以室家紛然
之故捐棄衣冠側身山野絕交遊之路杜仕宦之門閨門不出心專耕耘以求衣食何敢有功名之
路哉

與宣孟書

前人

居室之義人之大倫思厚歡和之節樂定金石之固又自傷前遭不良此有去兩婦之名事誠不得
不然豈中心之所好哉

方正直言極諫對

節

谷永

夫妻之際王事綱紀安危之機聖王所致慎也昔舜飭正二女以崇至德楚莊忍絕丹姬以成霸功
幽王惑於褒姒周德降亡魯桓脅於齊女社稷以傾誠修後宮之政明尊卑之序貴者不得嫉妒專
寵以絕驕嫚之端抑褒閭之亂賤者咸得秩進各得厥職以廣繼嗣之統息白華之怨後宮親屬饒

古今圖書集成
之以財勿與政事以遠皇父之類損妻黨之權未有閨門治而天下亂者也

立張氏爲惠帝后論

荀悅

夫婦之際人道之大倫也詩稱刑于寡妻至于兄弟以御于家邦易稱正家道家道正而天下大定矣姊子而爲后昏於禮而黷於人情非所以示天下作民則也羣臣莫敢諫過哉

報妻書

秦嘉

不能養志當給郡使隨俗順時僂俛當去知爾所苦尙未有瘳想念悵悵勞心無已當涉遠路趨走風塵非志所慕慘慘少樂又計往還將彌時節念發同怨意猶遲遲欲暫相見有所屬託今遣車往想必自力

重報妻書

前人

車還空返甚失所望兼叙遠別恨恨之情顧尤悵然間得此鏡旣明妍媸及觀文彩世所希有意甚愛之故以相與並寶釵一隻好香四種素琴一張常所自彈也明鏡可以鑒形寶釵可以耀首芳香可以馥身素琴可以娛耳

答嘉書

徐淑

知屈珪璋應奉歲使策名王府觀國之光雖失高素皓然之業亦是仲尼執鞭之操也自初承問心願東還迫疾未宜抱嘆而已日月已盡行有伴例想嚴裝已辦發邁在近誰謂宋遠企予望之室邇人遐我勞如何深谷逶迤而君是涉高山巖巖而君是越斯亦難矣長路悠悠而君是踐冰霜慘烈而君是履身非形影何得動而輒俱體非比目何得同而不離於是詠萱草之喻以消兩家之思割今日之恨以待將來之歡君適樂土優游京邑觀王都之壯麗察天下之珍妙得毋目玩意移往而不能出耶

又答嘉書

前人

既惠令音兼賜諸物厚顧慙慙出於非望鏡有文彩之麗釵有殊異之觀芳香既珍素琴益好惠異物於鄙陋割所珍以相賜非豐恩之厚孰肯若斯覽鏡執釵情意髣髴操琴咏詩思心成結勅以芳香馥身喻以明鏡鑒形此言過矣未獲我心也昔詩人有飛蓬之感班婕妤有誰容之歎素琴之作當須君歸明鏡之鑒尙待君還未奉光儀則寶釵不列也未侍帷帳則芳香不發也

協和婚賦

蔡邕

惟情性之至好歡莫偉於夫婦受精靈之造化固神明之所使事深微以元妙實人倫之肇始考邃初之原本肇陰陽之綱紀乾坤和其剛柔良兌感其腠腠葛覃恐其失時標梅求其庶士唯休和之盛代男女得乎年齒婚姻協而莫違播欣欣之繁祉良辰既至婚禮已舉二族崇飾威儀有序嘉賓僚黨祁祁雲聚車服照路驂駢如舞旣臻門屏結軌下車阿傅御豎鴈行蹉跎麗女盛飾爛如春華

出婦賦

魏文帝

思在昔之恩好似比翼之相親惟方今之疎絕若驚風之吹塵夫色衰而愛絕信古今其有之傷覺獨之無恃恨後嗣之不滋甘沒身而同穴終百年之長期信無子而應出自典禮之常度悲谷風之不答怨昔人之忽故被入門之初服出登車而就路遵長途而南邁馬躊躇而廻顧野鳥翩而高飛愴哀鳴而相慕撫駢服而展節卽臨沂之舊城踐麋鹿之曲蹊聽百鳥之羣鳴情悵悵而顧望心鬱結其不平

寡婦賦

有序

同前

陳留阮元瑜早亡每感存其遺孤未嘗不愴然傷心故作斯賦

惟生民兮艱危在孤寡兮常悲人皆處兮歡樂我獨怨兮無依撫遺孤兮太息俛哀傷兮告誰三辰
周兮遞照寒暑運兮代臻歷夏日兮苦長涉秋夜兮漫漫微霜隕兮集庭燕雀飛兮我前去秋兮就
冬改節兮時寒水凝兮成冰雪落兮翻翻傷薄命兮寡獨內惆悵兮自憐

謝妻改封陳妃表

曹植

璽書今以東阿王妃爲陳王妃並下印綬因故上前所假印以其拜授書以卽日到臣輒奉詔拜其
才質底下謬同受私遇寵素餐臣爲其首陛下體乾坤育物之德東海含容之大乃復隨例顯封大
國光揚章灼非臣負薪之才所宜克當非臣穢豐所宜蒙獲夙夜憂歎念報罔極洪施遂隆旣榮枝
幹猥復正臣妃爲陳妃光耀宣朗非妾婦蠢愚所當蒙被葵藿草物猶感恩養況臣含氣銜佩弘惠
歿而後已誠非翰墨屢辭所能報答

出婦賦

前人

以才薄之陋質奉君子之清塵承顏色以接意恐疏賤而不親悅新婚而忘妾哀愛惠之中零遂摧

古今圖書集成
頽而失望退幽屏於下庭痛一旦而見棄心忉忉以悲驚衣入門之初服背牀室而出征攀僕御而登車左右悲而失聲嗟冤結而無訴乃愁苦以長窮恨無愆而見棄悼君施之不終

寡婦賦

王粲

闔門兮却掃幽處兮高堂提孤孩兮出戶與之步兮東廂顧左右兮相憐意悽愴兮摧傷觀草木兮敷榮感傾葉兮落時人皆懷兮歡豫我獨感兮不怡日晡曖兮不昏明月皎兮揚暉坐幽室兮無爲登空牀兮下幃涕流連兮交頸心慙結兮增悲

出婦賦

前人

既僥倖兮非望逢君子兮弘仁當隆暑兮翕赫猶蒙眷兮見親更盛衰兮成敗恩彌固兮日新竦余身兮敬事理中饋兮恪勤君不篤兮終始樂枯莢兮一時心搖蕩兮變易忘舊姻兮棄之馬已駕兮在門身當去兮不疑攬衣帶兮出戶顧堂室兮長辭

寡婦賦

丁廙

惟女子之有行固歷代之彝倫辭父母而言歸奉君子之清塵如懸蘿之附松似浮萍之託津何性

命之不造遭世路之險迤榮華矚其始茂所恃奄其徂泯靜閉門以却埽魂孤焚以窮居刷朱扉以白堊易元帳以素幃含慘悴以何訴抱弱子以自慰時翳翳以東陰日疊疊以西墜雞斂翼以登棲雀分散以赴肄還空牀以下幃拂衾褥以安寐想逝者之有憑因宵夜之髣髴痛存歿之異路終窳漠而不至時荏苒而不留將遷靈以大行駕龍輻於門側設祖祭於前廊彼生離其猶難矧永絕而不傷自銜恤而在疚履冰冬之四節風蕭蕭而增勁寒凜凜而彌切霜淒淒而夜降冰濺濺而晨結瞻靈宇之空虛悲屏幌之徒設仰皇天而嘆息腸一日而九結惟人生于世上若馳驥之過櫺計先後其何幾亦同歸乎幽冥

女史箴

晉張華

茫茫造化二儀始分散氣流形既陶既甄在帝庖犧肇經天人爰始夫婦以及君臣家道以正王猷有倫婦德尚柔含章貞吉婉孌淑慎正位居室施衿結褵虛恭中饋肅慎爾儀式瞻清懿樊姬感莊不食鮮禽衛女矯桓耳忘和音志厲義高而二主易心元熊攀檻馮媛趨進夫豈無畏知死不恡班妾有詞割歡同輦夫豈不懷防微慮遠道罔隆而不殺物無盛而不衰日中則昃器滿則傾崇猶塵

積替若駭機人咸知飾其容而莫知飾其性性之不飾或愆禮正斧之藻之克念作聖出其言善千里應之苟違斯義則同衾以疑夫出言如微而榮辱由茲勿謂幽昧靈鑒無象勿謂元漠神聽無響無矜爾榮天道惡盈無恃爾貴隆隆者墜鑒於小星戒彼攸遂此心螽斯則繁爾類歡不可以黷寵不可以崇崇實生慢愛極則遷致盈必損理有固然美者自美翩以取尤冶容求好君子所讎結恩而絕職此之由故曰翼翼矜矜福所以興靖恭自思榮顯所期女史司箴敢告庶姬

別郗氏妻

王獻之

獻之初取郗曇女名道茂及爲祕書丞尙新安公主及獻之遇疾道家上章法應首過對曰不覺餘事惟憶與郗家離婚

雖奉對積年可以爲盡日之歡常苦不盡觸類之暢方欲與婦極當年之足以之偕老豈謂乖別至此諸懷悵塞實深當復何繇日夕見婦耶俯仰悲咽實無已無已唯當絕氣耳

楚狂接輿妻贊

左貴嬪

接輿高潔懷道行謠妻亦冰清同味元昭遺俗榮津志遠神遼

齊杞梁妻贊

前人

遭命不辰逢時險屯夫卒莒場郊弔不賓哀崩高城訴情穹旻遂赴淄川托軀清津

悼亡賦

潘岳

伊良嬪之初降幾二紀以迄茲遭兩門之不造備荼毒而嘗之嬰生艱之至極又薄命而早終含芬華之芳烈翩零落而從風神飄忽而不反形安得而久安翼時服於遺質表鉛華於餘顏問筮賓之何期宵過分而參闕詎幾時而見之目眷戀以相屬聽雞人之唱籌來聲叫以連續聞冬夜之恆長何此夕之一促且伉儷之片合垂明哲乎嘉禮苟此義之不謬乃全身之半體吾聞喪禮之在妻謂制重而哀輕既履冰而知寒吾今信其緣情夕既昏兮朝既清延爾族兮臨後庭入室兮望靈座帷飄飄兮燈熒熒燈熒熒兮如故帷飄飄兮若存物未改兮人已化饋生塵兮酒停樽春風兮泮冰初陽兮戒溫逝逍遙兮浸遠嗟熒熒兮孤魂

哀永逝文

前人

啟夕兮宵興悲絕緒兮莫承俄龍輻兮門側嗟俟時兮將升嫂姪兮悼惶慈姑兮垂矜聞鳴鷄兮戒

朝咸驚號兮撫膺逝日長兮生年淺憂患衆兮歡樂鮮彼遙思兮離居歎河廣兮宋遠今奈何兮一
舉邈終天兮不反盡余哀兮祖之晨揚明燎兮揔靈輶撤房帷兮席庭筵舉醑觴兮告永遷悽切兮
增欷俯仰兮揮淚想孤魂兮眷舊宇視倏忽兮若髣髴徒髣髴兮在慮靡耳目兮一過停駕兮淹留
徘徊兮故處周求兮何獲引身兮當去去華輦兮初邁馬廻首兮旋旆風冷冷兮入帷雲霏霏兮承
蓋鳥俛翼兮忘林魚仰沫兮失瀨悵悵兮遲遲遵吉路兮凶歸思其人兮已滅覽餘跡兮未夷昔同
塗兮今異世憶舊歡兮增新悲謂原隰兮無畔謂川流兮無岸望山兮寥廓臨水兮浩汗視天日兮
蒼茫面邑里兮蕭散匪外物兮或改固歡哀兮情換嗟潛隧兮旣敞將送形兮長往委蘭房兮繁華
襲窮泉兮朽壤中慕叫兮擗擗之子降兮宅兆撫靈櫬兮訣幽房棺冥冥兮塋窈窈戶闔兮燈滅夜
何時兮復曉歸反哭兮殯宮聲有止兮哀無終是乎非乎何遑趣一過兮目中旣過目兮無兆曾寤
寐兮弗夢旣顧瞻兮家道心長寄兮爾躬重曰已矣此蓋新哀之情然耳渠懷之其幾何庶無愧兮

莊子

寡婦賦

有序

前人

樂安任子咸者有韜世之量與余少而歡焉雖兄弟之愛無以加也不幸弱冠而終良友既沒何痛如之其妻又吾姨也少喪父母適人而所天又殞孤女藐焉始孩斯亦生民之至艱而荼毒之極哀也昔阮瑀既沒魏文悼之並命知舊作寡婦之賦余遂擬之以叙其孤寡之心焉其辭曰

嗟予生之不造兮哀天難之匪忱少伶俜而偏孤兮痛切怛以摧心墜寒泉之遺歎兮詠蓼莪之餘音情長感以永慕兮思彌遠而逾深伊女子之有行兮爰奉嬪於高族承慶雲之光覆兮荷君子之惠渥顧葛藟之蔓延兮託微莖於樛木懼身輕而施重兮若履冰而臨谷遵義方之明訓兮憲女史之典戒奉蒸嘗以效順兮供灑埽以彌載彼詩人之攸嘆兮徒願言而心痾何遭命之奇薄兮遭天禍之未悔榮煜其始茂兮良人忽以捐背靜闔門以窮居兮塊然獨而靡依易錦茵以苫席兮代羅幃以素帷命阿保而就列兮覽巾篋以舒悲口鳴噎以失聲兮淚橫迸而霑衣愁煩冤其誰告兮提孤孩於坐側時曖曖而向昏兮日杳杳而西匿雀羣飛而赴楹兮雞登棲而斂翼歸空館而自憐兮撫衾幃以歎息思纏綿以贅亂兮心摧傷以愴惻矐靈勝而遄邁兮四節運而推移天凝露而降霜兮木葉落而隕枝仰神宇之寥寥兮瞻靈衣之披披退幽悲於堂隅兮進獨拜於牀垂耳傾想於疇

昔兮目髣髴乎平素雖冥冥而罔覲兮猶依依以憑附痛存亡之殊制兮將遷神而安居龍輻儼其
星駕兮飛旒翩以啟路輪按軌以徐進兮馬悲鳴而踟蹰潛靈邈其不反兮殷憂結而靡訴晞形影
於几筵兮馳精爽於丘墓自仲秋而在疚兮踰履霜以踐冰雪霏霏而驟落兮風瀏瀏而夙興雪洽
洽以夜下兮水濂濂以微凝意恍惚以遷越兮神一夕而九升庶浸遠而哀降兮情惻惻而彌甚願
假夢以通靈兮目炯炯而不寢夜漫漫以悠悠兮寒淒淒以凜凜氣憤薄而乘霄兮涕交橫而流枕
亡魂逝而永遠兮時歲忽其邁盡容貌儼以頓悴兮左右淒其相慙感三良之殉秦兮甘捐生而自
引鞠稚子於懷抱兮嗟低回而不忍獨指景而心誓兮雖形存而志隕重日仰皇穹兮歎息私自憐
兮何極省微身兮孤弱顧稚子兮未識如涉川兮無梁若凌虛兮失翼上瞻兮遺象下臨兮泉壤窈
冥兮潛翳心在兮目想奉靈坐兮肅清憩空宇兮曠朗廓孤立兮顧影塊獨言兮聽響顧影兮傷摧
聽響兮增哀遙逝兮逾遠緬邈兮長乖四節流兮忽代序歲云暮兮日西頽霜被庭兮風入室夜旣
分兮星漢迴夢良人兮來遊若闔闔兮洞開怛驚悟兮無聞超惻惻兮慟懷慟懷兮奈何言陟兮山
阿墓門兮肅肅修隴兮峨峨孤鳥嚶嚶兮悲鳴長松萋萋兮振柯哀鬱結兮交集淚橫流兮滂沱蹈

恭姜兮明誓詠柏舟兮清歌終歸骨兮山足存憑託兮餘華要吾君兮同穴之死矢兮靡他

讓婚表

宋江敦

伏承詔旨當以臨海公主降嬪榮出望表恩加典外顧審輜蔽伏用憂惶臣寒門額族人凡質陋閭閻有對本隔天姻如臣素流室貧業寡年近將冠皆已有室荆釵布裙足得成禮每不自解無偶迄茲媒訪莫尋素族弗問自惟門慶屬降公主天恩所覃容及醜末懷憂抱惕慮不獲免徵命所當果膺茲舉雖門泰宗榮於臣非幸仰緣聖貸冒陳愚實自晉氏以來配尚王姬者雖累經美胄亟有名才至如王敦懞氣桓溫斂威真長佯愚以求免子敬炙足以違詔王偃無仲都之質而保露於北僭何瑀闕龍工之姿而投軀於深井謝莊殆自同於矇室殷冲幾不免於彊鉏數人者非無才意而勢屈於崇貴事隔於聞覽吞悲茹氣無所逃訴制勒甚於僕隸防閑過於婢妾往來出入人理之常當賓待客朋友之義而令掃轍息駕無闔門之期廢筵抽席絕接對之理非唯交友離異乃亦兄弟疎闊第令受酒肉之賜制以動靜監子荷錢帛之私節其言笑姆嬭爭媚相勸以嚴妮媼競前相諂以急第令必凡庸下才監子皆葭萌愚豎議舉止則未閑是非聽言語則謬於虛實姆嬭敢恃舊耆唯

古今圖書集成
贊妒忌尼媼自倡多知務檢口舌其間又有應答問訊上筮師母乃至殘餘飲食詰辯與誰衣被故
敝必責頭領又出入之宜繁省難衷或進不獲前或入不聽出不入則嫌於欲疏求出則疑有別意
召必以三晡爲期遣必以日出爲限夕不見晚魄朝不識曙星至於夜步月而弄琴書拱袂而披卷
一生之內與此長乖又聲影裁聞則少婢奔迸裙袂向席則老醜叢來左右整刷以疑寵見嫌賓客
未冠以少容致斥禮則有列媵象則有貫魚本無媵嫡之嫌豈有輕婦之謂況今義絕傍和虔恭正
匹而每事必言無儀適設辭輒言輕易我又竊聞諸主集聚唯論夫族緩不足爲急者法急則可爲
緩者師更相扇誘本其恆意不可貸借固實常辭或言野敗去或言人笑我雖家曰私理有甚王憲
發口所言恆同科律王藻雖復彊很頗經學涉戲笑之事遂爲冤魂褚曖憂憤用致天絕傷理害義
難以具聞夫螽斯之德實致克昌專妒之行有妨繁衍是以尙主之門往往絕嗣駙馬之身通離聲
咎以臣凡弱何以克堪必將毀族淪門豈伊身胥前後嬰此其人雖衆然皆患彰遐邇事融天朝故
吞言咽理無敢論訴臣幸屬聖明矜照由道弘物以典處親以公臣之鄙懷可得自盡如臣門分世
荷殊榮足守前基便預提拂清官顯宦或由才升一叨婚戚咸有恩假是以仰冒非宜披露丹實非